



# **Shoʻrchida “Yoshlar va turizm” koʻchasi ochildi hamda ijtimoiy soha obyektlari faoliyati bilan tanishildi**





Davlatimiz Rahbari tomonidan hududlarda yoshlarning boʻsh vaqtlarini mazmunli oʻtkazishi uchun sharoitlar yaratish hamda turizmni rivojlantirish, 24/7 rejimda faoliyat yurituvchi “Yoshlar va turizm” koʻchalarini tashkil etish boʻyicha vazifalar belgilab berilgan edi. Mazkur topshiriq ijrosini taʼminlash maqsadida Surxondaryo viloyatining har bir hududida bittadan jami 15 ta koʻcha tanlab olinib, namunaviy loyihalar asosida ishlar olib borilmoqda.


Jumladan, bugun Shoʻrchi tumani Guliston mahallasi hududida tashkil etilgan “Yoshlar va turizm” koʻchasi foydalanishga topshirildi. Tadbirda Surxondaryo viloyati hokimi Ulugʻbek Qosimov ishtirok etdi.















Sho'rchida tashkil etilgan mazkur ko'chada 2 ta mini stadion, 250 o'rinli tomoshagoh, "Varkout", basketbol, voleybol va harbiy-Vatanparvarlik musobaqalari o'tkazish uchun mo'ljallangan maydonlar hamda 50 o'rinli amfiteatr barpo etilgan. Shuningdek, ko'cha bo'ylab 3,4 km uzunlikda veloyo'lak tashkil etilgan. Bundan tashqari hududda gulchilik va ko'chatchilikka ixtisoslashtirilgan issiqxona ham qurilgan.

Viloyat rahbari ko'chaning tantanali ochilish marosimida ishtirok etib, tuman nuroniylari va faollari bilan suhbatlashdi. Shuningdek, hududda joylashgan maktabning bo'sh binosida tashkil etilgan sport to'garaklari hamda YoChQT va fizika faniga ixtisoslashtirilgan xonalar ko'zdan kechirildi.

















Tadbir yakunida mutasaddilar ko'cha bo'ylab tashkil etilayotgan bog' hududiga daraxt ko'chatlari ekdi.


Surxondaryo viloyati hokimi Ulug'bek Qosimov Sho'rchi tumaniga tashrifini davom ettirib, "Tolli" oilaviy shifokorlik punkti faoliyati bilan tanishdi.


Tibbiyot maskani sharoitlari, kadrlar bilan ta'minlanishi, shuningdek, bemorlarga xizmat ko'rsatish darajasi bilan tanishildi hamda mutasaddilarning oilaviy shifokorlar tomonidan ko'rsatiladigan dastlabki tibbiy yordam, diagnostika va profilaktika xizmatlar borasidagi axboroti tinglandi. Oilaviy shifokorlik punktlarining aholi salomatligi uchun ahamiyati ta'kidlanib, xizmat sifatini oshirish, zarur uskunalar bilan ta'minlash bo'yicha qo'shimcha tavsiyalar berildi.











Shundan so'ng, 20-sonli davlat maktabgacha ta'lim tashkiloti faoliyati bilan tanishilib, bolalar uchun yaratilgan sharoitlar ko'zdan kechirildi. Viloyat rahbari bolalarni sog'lom ovqatlanitirish borasida amalga oshirilayotgan ishlar hamda mavjud sharoitlarga e'tibor qaratdi. Bolalarga ratsion asosida, sanitariya-gigiena qoidalariga qat'iy amal qilgan holda tayyorlangan ovqatlarni berish lozimligini ta'kilab, mutasaddilarga bu borada qat'iy nazorat o'rnatish vazifasini topshirdi.